

Tica Giel su concierto tabata sublime



ORANJESTAD - Diasabra 30 di november, e gran concierto di Tica Giel a tuma luga den Cas di Cultura. Prome cu tur hende a drenta e sala, por a sinti caba cu algo grandi, algo fenomenal ta bay spera nan.

E simpel hecho cu a pidi publico pa bin bisti cu trahe formal, ya a duna un señal hopi positivo cu ta duna respet pa hisa prestigio atrobe di Cas di Cultura. Di tur banda por a tende cu publico sigur ta aplaudi e peticion aki. Despues cu e chikitin Zigiel Tromp a bati e bel pa anuncia inicio di e concierto, e au-

diencia por a scucha e piesa instrumental "Beau Soir" di Bill Pears. Pa un rato a wanta rosea aden ora a mira e cortina habri, pa bo tende despues un suspiro profundo for di e sala y e expresion "WAW!...". No a spera nada otro, ya cu e tremendo decoracion di escenario (obra di Mirto Tromp) sigur a haci un impacto grandi riba e publico. Na e momento ey, ya nos flamante soprano Tica Giel tabata para riba e tapijt cora y su pianista Arubiano Armand Simon sinta na e hala, pa inicia e prome parti di e concierto. Na un manera sumamente

profesional e MC di e anochi ey, Nerisa Quant-Giel a yama tur hende bonbini y cada biaha a duna un splicacion cortico di e contenido di sea cancion clasico, of arianan for di oratorio, cantante y opera cu Tica a interpreta. Tica tabata briya den su trahe special pa e ocasion aki, cu tambe ta obra di Mirto Tromp. Hunto cu su coro "Den Harmonia", na un manera sublime Tica a laga publico celebra hunto cun'e su 35 aña ta duna presentacion di canto clasico, tambe 30 aña cu el a gradua pa solista clasico y 25 aña di graduacion como cantante di opera.

Despues di intermedio a sigui e parti cu canticanan popular cu acompañamento di un combo forma pa Pepe Gonzalez, Juan Tromp, Ivan Quandus, Angelo Kock, Ebby Peterson y Tino Ruiz (2 cancion). Coro mixto 'Den Harmonia' y un coro hubenil, forma pa algun alumno di Scol St. Anna, a canta tambe hunto cu e solista den algun cantica. Combo y coro tabata bou direccion di Pepe Gonzalez. Por a nota cu cada cancion a cay masha na agrado di e audiencia. Comosifuera ta poco,

mariachi Lirios del Campo bou direccion di Vicente Tromp a cana kibra, for di porta di entrada bay dilanti cu nan tema musical. Tica Giel cu sombre di mariachi den man a canta tres cancion Mexicano. Mariachi Lirios del Campo, manera semper, a muestra un nivel halto di profesionalismo pa compaña Tica cu e cancionnan aki. E audiencia a aprecia esaki masha hopi y a duna aplauso largo como muestra di gratitud y aprecio.

Pa completa e tremendo concierto aki Tica Giel a bin cu otro sorpresa. Loke ningun hende por a spera, a sosode. E combo a start sali cu e salsa Quimbara di Celia Cruz. Nos por a nota un otro Tica Giel ta interpreta e cancion bailabel aki, manera cu e tin hopi aña caba ta canta salsa! WAW! Publico a keda impresiona y a pidi pa mas. Pero,... tabatin un sorpresa mas. E biaha aki ta e coro "Den Harmonia", riba iniciativa di Maybelline Arends-Croes, a duna Tica un sorpresa cu un cancion dedica na su persona na ocasion di e bunita celebracion aki. No tin palabra pa splica e emocion grandi cu Tica a sinti, e felicidad cu el a exper-

encia cu tin asina tanto hende (por cierto te hasta for di exterior) cu a bin muestra nan aprecio pa tur loke el a logra durante su carera impresionante aki. Publico a pidi pa mas y cu hopi amor Tica Giel a ripiti Quimbara, pa despues bay den publico y gradici nan pa nan presencia y nan apoyo. Ta tur hende kier a saca foto cu Tica y ta tur ta puntra ta ki dia lo ripiti e concierto aki, pasobra nan kier ta presente un biaha mas. Aki ta sigui djis algun expresion cu a ser capta e anochi ey y durante siman: "Tica a ofrece na e comunidad di Aruba algo grandi", "Dios a regala nos un dama cu un bos virtuoso", "E concierto aki ta bal mas cu 100 florin", "Mira y scucha kico nos mes Arubianonan por!", "Mare tur siman por tin un concierto di e nivel aki", "Tremendo concierto", "Nos a disfruta, tur cos tabata bunita", "Een heel zuivere en schone stem", "For di cuminsamento te fin mi a sinta gosa, ta pica cu e anochi t'asina cortico", "Esta un anochi bunita, tur cos ta na orden, ta pica cu nos mes ter a bin cas", "Pa mi Tica por a sigui canta mas", "Den un palabra: PRECIOSO!" □